

Na osnovu člana 50. Poslovnika Predstavničkog doma Parlamentarne skupštine Bosne i Hercegovine i člana 44. Poslovnika Doma naroda Parlamentarne skupštine Bosne i Hercegovine ("Službeni glasnik BiH", br. 33/06,41/06,81/06,91/06 i 91/07), Zajednička komisija za ekonomske reforme i razvoj Parlamentarne skupštine Bosne i Hercegovine, na 4. sjednici održanoj 31. jana 2008., usvojila je

IZVJEŠTAJ O RADU ZAJEDNIČKE KOMISIJE ZA EKONOMSKE REFORME I RAZVOJ ZA 2007.

Uvodne napomene

Zajednička komisija za ekonomske reforme i razvoj (u daljnjem tekstu: Komisija) Parlamentarne skupštine Bosne i Hercegovine je stalno radno tijelo. Njena nadležnost regulirana je odredbama člana 56. Poslovnika Predstavničkog doma i člana 50. Poslovnika Doma naroda ("Službeni glasnik BiH", br. 33/06, 41/06, 81/06, 91/06 i 91/07).

Na 3. sjednici Predstavničkog doma, održanoj 9. 2. 2007., izabrani su članovi Komisije: Bajazit Jašarević, Rifat Dolić, Azra Hadžiahmetović, Hadži Jovan Mitrović, Mehmed Suljkanović i Jovan Todorović; a na 2. sjednici Doma naroda, održanoj 16. 3. 2007., izabrani su: Drago Ljubičić, Rudo Vidović, Adem Ibrahimpašić, Ivo Miro Jović, Hazim Rančić i Slobodan Šaraba.

Konstituirajuća sjednica Komisije održana je 21.3.2007., na kojoj je jednoglasno izabran Drago Ljubičić za predsjedavajućeg Komisije; Bajazit Jašarević za prvog zamjenika i Rudo Vidović za drugog zamjenika predsjedavajućeg.

Radno mjesto sekretara Komisije nije popunjeno. Na prijedlog Kolegija Sekretarijata, Emira Češljara, sekretar Komisije za vanjsku trgovinu i carine u Predstavničkom domu, odlukom kolegija oba doma, od 8.5. 2007., imenovana je za privremenog sekretara Komisije. Odlukom o organizaciji Sekretarijata Parlamentarne skupštine BiH u Uredu Komisije sistematizirana mjesta savjetnika i saradnika nisu popunjena.

Komisija je od konstituiranja radila na provođenju obaveza utvrđenih poslovnica, kao i obaveza koje su joj određene odlukama kolegija domova.

Opći podaci o sjednicama Komisije i prisustvo sjednicama

Općim odredbama o komisijama domova i općim odredbama o zajedničkim komisijama oba doma utvrđenim poslovnica regulirano je: osnivanje zajedničkih komisija; broj i struktura članova komisije; dužnosti; organizacija rada; sazivanje sjednica; donošenje odluka komisije; saradnja s drugim komisijama i tijelima; metode rada; osnivanje potkomisija ili radnih grupa.

U periodu od 21. 3. do 31.12. 2007. Komisija je održala tri sjednice, a 4. sjednica, zakazana za 17. 12.2007., iz objektivnih razloga nije održana.

Prisustvo članova sjednicama Komisije izraženo u procentima bilo je 75%.

Od 12 članova Komisije opravdano su odsustvovala sa svake sjednice tri člana, a sjednica Komisije u prosjeku je trajala 65 minuta.

Aktivnosti na sjednicama praćene su zapisnički. Zapisnike sjednica vodi sekretar Komisije prema usvojenim tačkama dnevnog reda po utvrđenoj poslovničkoj proceduri i metodologiji.

U saradnji s predsjedavajućim i članovima Komisije, konačan tekst zapisnika definira se i dostavlja na lektoriranje na jezike u službenoj upotrebi u BiH.

Interna organizacija i procedure

Prema planovima aktivnosti domova iz nadležnosti Komisije, koje određuju kolegiji Predstavničkog doma i Doma naroda, predsjedavajući Komisije, u saradnji sa sekretarom, organizira i zakazuje sjednicu s prijedlogom dnevnog reda.

Planovi aktivnosti Komisije i njenih članova utvrđuju se prema orijentacionim radnim planovima domova i orijentacionom radnom planu Komisije.

Orijentacioni radni plan za 2007. godinu Komisija je usvojila na 2. sjednici. Usvojen je zaključak da se radni plan može korigirati i dopunjavati u daljnjem radu, zavisno od materije, i uz ostvarivanje maksimalne saradnje s Vijećem ministara BiH i koordinacije s Direkcijom za evropske integracije, Direkcijom za ekonomsko planiranje, Ministarstvom vanjskih poslova BiH, Agencijom za unapređenje stranih investicija (FIPA), Izvozno-kreditnom agencijom (IGA) i svim institucijama vezanim za oblast ekonomskih reformi i razvoja, te ostvarivanje saradnje s nevladinim sektorom.

Sjednici Komisije treba da prisustvuje najmanje sedam njenih članova, uz uslov da je prisutna najmanje polovina članova iz svakog doma, kako bi mogli pravovaljano odlučivati. Komisija odlučuje prostom većinom članova koji su prisutni i glasaju, uz uslov da ta većina sadrži jednu trećinu članova svakog doma koji su prisutni i glasaju i jednog predstavnika iz konstitutivnih naroda.

Rezultati glasanja zapisnički se konstatiraju za svaku tačku dnevnog reda, kao i za prijedloge i zaključke koje Komisija usvoji.

Izveštaje koje Komisija podnosi domovima priprema sekretar Komisije u saradnji s predsjedavajućim, a prema potrebi i ostalim članovima Komisije kada to nalažu određeni razlozi.

Zakonodavna aktivnost

U navedenom periodu Komisija nije razmatrala nijedan prijedlog zakona dostavljen u parlamentarnu proceduru.

Informativna aktivnost

U okviru ove aktivnosti, Komisija je razmatrala materijal Istraživačkog sektora Parlamentarne skupštine BiH upućen članovima Parlamenta o temi „Ekonomske reforme“, s prijedlogom kolegija oba doma. Imajući u vidu da je cilj materijala bio davanje presjeka ekonomskih reformi u zemlji, njihovih nosilaca (VMBiH i MMF), davanje smjernica, kao oblika pomoći parlamentarcima u radu, o tome izvršava li Vijeće ministara BiH svoje obaveze o ovim pitanjima, odgovaranje na pitanja o ekonomskim reformama, Komisija je zaključila da navedeni materijal prihvati kao polaznu osnovu za sagledavanje stanja u oblasti ekonomskih reformi u BiH.

U organizaciji Svjetske banke i u saradnji s Ministarstvom vanjskih poslova Grčke, tri člana Komisije: **Drago Ljubičić, Rudo Vidović i Rifat Dolić** prisustvovala su u radu 4. foruma PRSP-a (**Strategija za smanjenje siromaštva**) zemalja zapadnog Balkana, održanom 26. i 27. juna 2007. u Atini. Glavne teme Foruma odnosile su se na stanje u sektoru energetike, te na reforme koje se provode ili planiraju. Inače, Forum je bio zamišljen kao razmjena informacija i iskustava zemalja učesnica o suštinskim pitanjima iz ove oblasti (BiH, Srbije, Crne Gore, Albanije, Kosova i Makedonije).

Izveštaj podnesen Komisiji s navedenog foruma prihvaćen je na 3. sjednici Komisije.

Članovi Komisije, zajedno s članovima Komisije za finansije i budžet Doma naroda u zgradi institucija BiH, 13. 6. 2007., razgovarali su s Hermanom Wijffelsom, izvršnim direktorom Svjetske banke. Svrha sastanka bila je da se izvršni direktor Svjetske banke kao zastupnik BiH u Odboru direktora Svjetske banke upozna sa situacijom u BiH i njenim potrebama, te na osnovu sagledavanja stanja procijeni šta treba učiniti da se situacija u BiH poboljša.

Članovi Komisije prihvatili su zabilješku sa sastanka i prijedlozima za pomoć u određenim segmentima.

Rezultati rada članova Komisije

Imajući u vidu opis poslova i utvrđene poslovničke procedure, može se konstatirati da aktivnosti Komisije nisu bile većeg obima. Konstatirano je da je Komisija manje angažirana zato što je razmatrana materija bila u nadležnosti komisija za finansije i budžet i komisija za vanjsku trgovinu i carine domova. Smatra se da je razmatranje ekonomskog razvoja uglavnom u nadležnosti entitetskih vlada.

Ostale aktivnosti

Komisija je usvojila dva zaključka, dostavila ih u daljnju proceduru kolegijima domova i predložila:

- * da Komisija za vanjsku trgovinu i carine Predstavničkog doma, zajedno s Vijećem ministara BiH, usaglasi prijedlog izmjena i dopuna zakona o carinskoj tarifi, carinskoj politici i akcizama;

- * da se ostvareni suficit u Budžetu institucija BiH iz prethodne budžetske godine raspoređuje s rebalansom budžeta na budžetske korisnike i da se ostvareni suficit može rasporediti i odlukom Parlamentarne skupštine BiH na razvojne i/ili infrastrukturne projekte, na prijedlog Vijeća ministara BiH.

Prihvaćena je inicijativa Vanjskotrgovinske komore BiH, da ubuduće, prema potrebi, i ova institucija bude uključena u rad Komisije.

Opća procjena i sugestije

Na osnovu navedenih aktivnosti, može se zaključiti da je Komisija realizirala postavljene zadatke.

Za još uspješniji rad Komisije potrebno je osigurati kancelarijski prostor i u što skorije vrijeme popuniti tri upražnjena radna mjesta.

Potrebno je, također, obavezno planirati da se sjednice Komisije održavaju najmanje dva do tri dana prije održavanja sjednica domova.

Predsjedavajući Zajedničke komisije
Drago Ljubičić